



## 伯公

莊頭在中个大榕樹下，有一間柴屋起个舊陋伯公廟。廟裡背服侍一尊樹頭割个伯公。這伯公著等一身金若若仔个神袍。來唱喏个人緊來緊多，莊仔項聽著伯公顯靈个事情乜跔等仔多起來也。在這間廟裡背，還有服侍一尊泥作个伯公，毋過，佢分人放在廟个側角，係無認真尋，愛尋著佢斯無恁簡單，尤其係佢泥作个圓身，根本就毋會錫人注意。

這莊仔項个人，本本過等佢等日常个生活，來點香唱喏个人，係看著該尊一身金若若仔个伯公，大家總會講：「好得有這恁靈个伯公來保佑，佢等正有平安个日仔好過。」

有一日，這尊伯公同該泥作伯公講：「你看啊！著等這身金若若仔个神袍，佢个法力就加一等強，這兜百姓盡好來敬佢，求佢分佢等平安幸福賺大錢，無像你，泥作个伯公厝厝糟糟，還係屏角下好啦！」

泥作伯公聽著這兜話敘，聽聽啊就詐耳公過，本本恬恬仔在側角，無愛搭佢，因為佢知得自家个身分。佢相信，莊仔項个人來唱喏，毋單只係來拜該尊著等盡鬧神袍个伯公。講就自家毋錫人看，村民乜會敬自家，盍仰仔講自家乜係一尊伯公。

又有人來唱喏也！拜啊拜仔，有人注意著這尊泥作伯公，這時節就有人講：「恁做得著，仰會有恁厝糟个伯公神像？莫怪會分人擲啊在這角下，斯講會放在這，拜也無麼个作用。」

泥作伯公聽著這兜話，心肚仔跔等就懊躁起來。講就講對自家還有息把仔信心，毋過該兜人戗洗个話，佢聽起來心肚還係盡清苦。這時節，該尊著神袍个伯公就同佢講：「你看啊！該兜莊仔項个人係來同佢唱喏个，佢等正毋信你這泥作伯公，你正式一身都係泥，麼个價值都無。」

日仔慢慢仔過去也，有一日來也一個細阿哥仔。佢點著也番仔油燈盞火，想愛點香來唱喏。毋過，這細阿哥仔一無注意，嘎同燈盞火撞厝，這細細个燈盞火，無幾久就同伯公廟還著屋。火燒啊十分烈，村民緊門門仔攞水來救，救斯救著也，毋過這柴屋伯公廟也分火燒啊差毋多也。

等到大家來清潔該下，該尊著等金若若仔个神袍个伯公，早就跔等該身神袍，化做一堆火灰也。顛倒在廟个角下，原來園泥作伯公該跡仔，大家發現一塊金金、千足个金塊。

這時節，有一個盡老个村民正敢一下大氣同大家講：「唉！佢惱起來也！在佢還盡細該下，這間廟本來服侍一尊黃金作个伯公，後來大家驚分賊仔偷走，就同佢用爛泥膏起來，日仔久也，大家人也添放核也，就覺著佢正式係泥作个伯公。過後有人看著泥作伯公恁嬌，就有人建議，講用樹頭割過一尊伯公。唉！大家人搞差也！」

這時節村民正清醒，原來大家每日來唱喏个，係著等金若若仔个神袍，好看定定个伯公！

作者：陳志寧

### ☆詞彙學習☆

【服侍】fug sii：供奉。

【割】god：割刻。

【唱喏】cong ia：拜拜。

【泥作】nai zog：泥塑的。

【詐耳公過】za ngi gung go：聽聽就好。

【盍】ang：強調語氣用詞，有「再…」的意思。

【撞厝】cong o：撞翻倒。

【園】kong：放著、放在。